



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-1/21-3-40-114-4/26**

Datum: **25.05.2026. godine**

«Agencija za vodno područje rijeke Save» Sarajevo rješavajući po zahtjevu poslovnog subjekta – fizičkog lica Obrt PPSP «Očuz» vl. Očuz Mirzet iz Visokog, za donošenje rješenja o vodnoj dozvoli za ispuštanje tehnoloških otpadnih voda u prirodni recipijent sa lokacije objekta za preradu mesa u naselju Uvorići, grad Visoko, na osnovu člana 109. stav (1) tačka 2. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 48/99 i 61/22), donosi

RJEŠENJE **o vodnoj dozvoli**

1. Poslovnom subjektu – fizičkom licu Obrt PPSP «Očuz» vl. Očuz Mirzet iz Visokog daje se vodna dozvola za ispuštanje tehnoloških otpadnih voda u prirodni recipijent sa lokacije objekta za preradu mesa izgrađenog u naselju Uvorići, na zemljištu označenom kao k.č. broj: 650, 651/1, 652/2 i 653 K.O. Uvorići, grad Visoko.
2. Vodna dozvola se daje na osnovu pregleda dostavljene dokumentacije, uviđaja na objektu, utvrđenog činjeničnog stanja i uz sljedeće uslove:
 - 2.1. Da se upotreba i korištenje predmetnog objekta vrši u skladu sa njegovom prirodom i namjenom te u skladu sa dostavljenom dokumentacijom i uslovima iz ove vodne dozvole.
 - 2.2. Da korisnik predmetnog objekta, za vrijeme trajanja ove dozvole, obezbjeđuje da se otpadne vode nastale pranjem opreme, uređaja i alata za preradu mesa, te pranja podova i radnih površina, nesmetano sakupljaju i odvođe na tretman u separator masti i ulja, a zatim ovako tretirane vode ispuštaju, preko okna za monitoring, u mjesnu kanalizaciju s krajnjim ispuštom u rijeku Gorušu.
 - 2.3. Prečišćene tehnološke vode moraju ostati u maksimalno dopuštenim granicama definiranim u Prilogu 8. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20, 96/20 i 1/24).
 - 2.4. Da se objekti čija je svrha odvođenje i prečišćavanje onečišćenih voda (separator masti i ulja, slivnici, rešetke i kanalizaciona mreža) redovno održavaju i koriste na način koji će obezbijediti njihovu potpunu ispravnost i funkcionalnost.
 - 2.5. Čišćenje i održavanje postrojenja za tretman otpadnih voda može vršiti isključivo firma ovlaštena za tu vrstu djelatnosti.
 - 2.6. Korisnik je obavezan da redovno vodi dnevnik o pražnjenju i odvozu sadržaja separatora masti i izdvojenom talogu iz separatora.
 - 2.7. Korisnik je dužan da redovno vrši skupljanje čvrstog opasnog i neopasnog otpada sa lokacije poslovnog objekta, te isti propisno skladišti do njegovog konačnog zbrinjavanja od strane ovlaštene organizacije.
 - 2.8. Korisnik objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring u skladu sa Uredbom o uslovima ispuštanja otpadnih voda u okoliš i sisteme javne kanalizacije. Učestalost i način ispitivanja vršiti u skladu sa članom 20. Uredbe o uslovima ispuštanja otpadnih voda u okoliš i sisteme javne kanalizacije. Rezultate analiza dostaviti ovoj Agenciji.
 - 2.9. Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlasti («Službene novine Federacije BiH», broj 14/10, 14/13, 26/14, 23/17 i 41/20).
 - 2.10. Talog iz separatora se ne smije ni privremeno odlagati na česticu „vodno dobro“, odnosno u vodotoke i na njihove obale.
 - 2.11. Ne dozvoljava se odlaganje na otvorenom prostoru i unošenje opasnog i neopasnog otpada, koji nastaje kao nus produkt u procesu rada predmetnog objekta, u vodotoke i na obale rijeka.

- 2.12. Investitor je obavezan pridržavati se svih mjera i uslova, propisanih u saglasnostima i dozvolama, izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.
3. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH“, broj 92/07, 46/09, 79/11, 88/12 i 03/16), Prilog 1. Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda, te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
 4. U periodu važenja ove dozvole, Korisnik je dužan provoditi sve mjere i aktivnosti propisane istom.
 5. U slučaju vanrednih situacija, havarijskih onečišćenja i drugih sličnih okolnosti čime bi bio ugrožen kvalitet voda, obavezno izvijestiti nadležne organe i postupati po nalogu mjerodavnih institucija te preduzimati hitne mjere i aktivnosti na sprečavanju širenja onečišćenja i na otklanjanju uzroka onečišćenja.
 6. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata, dođe do nastanka štete na predmetnom objektu obuhvaćenom ovom vodnom dozvolom, korisnik zaštitnih vodnih objekata nije odgovoran za nastale štete.
 7. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
 8. Ukoliko prilikom upotrebe predmetnog objekta za koji se izdaje ova vodna dozvola dođe do promjene režima površinskih i podzemnih voda, a te promjene prouzrokuju štete ma kakvog karaktera, korisnik objekta je dužan uzroke štete otkloniti, a nastale štete nadoknaditi.
 9. U ovoj upravnoj stvari plaćene su sve upravne takse.
 10. Ova vodna dozvola se, shodno članu 117. stav (1) Zakona o vodama, daje sa rokom važenja od 5 (pet) godina od dana pravosnažnosti ovog Rješenja.
 11. Prije isteka važnosti ove dozvole, korisnik je dužan da podnese zahtjev za izdavanje nove vodne dozvole.
 12. Ovo rješenje o vodnoj dozvoli može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

O b r a z l o ž e n j e

Poslovni subjekt – fizičko lice Obrt PPSP «Očuz» vl. Očuz Mirzet iz Visokog, dana 26.03.2026. godine, podnio je zahtjev za izdavanje vodne dozvole za ispuštanje tehnoloških otpadnih voda u prirodni recipijent sa lokacije objekta za preradu mesa u naselju Uvorići, izgrađenog na zemljištu označenom kao k.č. broj: 650, 651/1, 652/2 i 653 K.O. Uvorići, grad Visoko.

U provedenom postupku dostavljena je i pregledana sljedeća dokumentacija:

- Ovjerena kopija lične karte,
- Ovjerena kopija Rješenja o izmjeni rješenja o odobrenju za obavljanje obrta-prerada mesa broj: 05/2-17-1-350/23 od 20.12.2023. godine izdatog od Službe za finansije, privredu, poslovne prostore i ekonomski razvoj Grada Visoko,
- Ovjerena kopija Uvjerjenja o poreznoj registraciji od 15.01.2024. izdatog od Porezne uprave Federacije BiH-Kantonalni porezni ured Zenica,
- Dokaz o uplaćenju upravnoj taksi,
- Ovjerena kopija Rješenja o ispunjavanju propisanih veterinarsko-zdravstvenih uslova broj: UP1-05-20-9273-2/25 od 27.10.2025. godine izdatog od Ministarstva za poljoprivredu, šumarstvo i vodoprivredu Zeničko-dobojskog kantona,
- Ovjerena kopija Rješenja o odobrenju za upotrebu broj: 03/1-23-4-3/10 od 01.04.2010. godine izdatog od Službe za prostorno uređenje, imovinsko-pravne, geodetske, stambeno-komunalne poslove i zaštitu okoline Općine Visoko,
- Kopija Rješenja o vodnoj dozvoli broj: UP-I/25-3-40-097-4/21 od 05.04.2021. godine izdatog od «Agencije za vodno područje rijeke Save» Sarajevo,
- Kopija Računa za iscrpavanje taložnika broj: R-0-102/25 od 09.07.2025. godine izdatog od «SCHAFER» d.o.o. Ilijaš,
- Kopija Izvještaja o monitoringu kvaliteta i kvantiteta otpadnih voda pogona Obrt «OČUZ» Visoko broj: 283/26, mart 2026. godine, urađen od «Inspekt-RGH» d.o.o. Sarajevo,
- Kopija Izvještaja o monitoringu kvaliteta i kvantiteta otpadnih voda pogona Obrt «OČUZ» Visoko broj: 1927/25, oktobar 2025. godine, urađen od «Inspekt-RGH» d.o.o. Sarajevo,
- Glavni projekat, urađen od «SINTEZA» d.o.o. Visoko, šifra: 20-08, april 2008. godine (na uvid).

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u ovoj upravnoj stvari.

U skladu sa članom 12. stav (5) i (6) Pravilnika o sadržaju, obliku i uvjetima i načinu izdavanja i čuvanja vodnih akata («Službene novine Federacije BiH», broj: 31/15, 55/19, 41/20 i 63/22), izvršen je obilazak predmetnog objekta i tom prilikom je sačinjen Zapisnik o uviđaju broj: UP-1/21-3-40-114-3/26 od 12.05.2026. godine.

Na osnovu dostavljene dokumentacije i izvršenog uviđaja na licu mjesta utvrđeno je sljedeće:

- Objekat za preradu mesa izgrađen je u naselju Uvorići, grad Visoko. Kapacitet prerade je cca 10 t/mjesec gotovih proizvoda. Proizvode se suha goveđa pečenica, trajne kobasice, oblikovani proizvodi od usitnjenog mesa, mljeveno meso.
- Predmetni objekat je u funkciji i u njemu se obavlja djelatnost za koju je podnosilac registrovan.
- U objektu se ne vrši klanje stoke, meso za preradu se kupuje.
- Za predmetni objekat je ranije, od ove Agencije, ishodovano Rješenje o vodnoj dozvoli broj: UP-I/25-3-40-097-4/21 od 05.04.2021. godine. U toku uviđaja je utvrđeno da nije bilo izmjena u odnosu na navedenu vodnu dozvolu.
- Otpadne vode od pranja posuda, pribora, radnih površina i podova se prikupljaju sistemom slivnika i kanalizacione mreže i odvođe na tretman u separator masti. Ispust prečišćene vode je u mjesnu kanalizaciju, sa krajnjim ispuštanjem u rijeku Gorušu.
- Snabdijevanje vodom je obezbijeđeno iz mjesne vodovodne mreže.

Tačka 3. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada („Službene novine Federacije BiH“, broj 92/07, 46/09, 79/11 i 88/12) i Odlukom o visini posebnih vodnih naknada („Službene novine Federacije BiH“, broj 46/07, 10/14 i 03/16).

Na osnovu provedenog postupka, dostavljene dokumentacije i uviđaja izvršenog na predmetnoj lokaciji, a u svrhu smanjenja negativnih uticaja predmetnog objekta na stanje voda i vodni režim, podnosiocu zahtjeva su ovom vodnom dozvolom u tački 2. dispozitiva Rješenja propisani uslovi u skladu sa odredbama članova 53. i 116. Zakona o vodama, članova 12. i 13. Pravilnika o sadržaju, obliku, uvjetima, načinu izdavanja i čuvanja vodnih akata i odredbama člana 3. tačka cc) Uredbe o uslovima ispuštanja otpadnih voda u okoliš i sisteme javne kanalizacije, konstatuje se da je podnosilac zahtjeva poslovni subjekt – fizičko lice Obrt PPSP «Očuz» vl. Očuz Mirzet iz Visokog, ispunio minimum uslova za izdavanje vodne dozvole za ispuštanje tehnoloških otpadnih voda u prirodni recipijent, te je riješeno kao u dispozitivu ovog Rješenja.

Podnosilac zahtjeva je uplatio i posebne troškove shodno Zaključku ove Agencije, broj: UP-1/21-3-40-114-2/26 od 04.05.2026. godine.

Podnosilac zahtjeva je uplatio upravnu taksu u iznosu od 70 KM u skladu sa Zakonom o izmjenama i dopunama Zakona o federalnim upravnim taksama i tarifi federalnih upravnih taksi («Službene novine Federacije BiH», broj 06/98, 8/00, 45/10, 43/13 i 98/17).

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva u roku od petnaest dana od dana prijema Rješenja.

Žalba se predaje ovom organu neposredno ili preporučeno poštom. Žalba se taksira sa 15 KM administrativne takse prema tarifnom broju 3. Tarife federalnih administrativnih taksi.

Obrađivač akta: Sanja Miličić, građ.ing.

Po ovlaštenju

Rukovodilac sektora za izdavanje vodnih akata



Mihad Pezo, dipl.inž.građ.

Dostaviti:

- Obrt PPSP «Očuz» vl. Očuz Mirzet
Uvorići 44, 71300 Visoko
- Ⓞ AVP Sava, ISV-vodna knjiga
- sektor 50
- sektor 40 – arhiva
- oglasna ploča – AVP Sava